

ጳውሎስ ፒሊጲሲዮስ ኣሳሰ ጳፊዳ ኪታ ጊዶ ቆፋ

ጳውሎስ ሃ ኪታዛ ጳፊዳይ ማቂዶኒያ ጌቲቲዛ ኦሮሜ ካዎይ ሃሪዛሶን ዲዛ ፒሊጲሲዮስ ጌቲቲዛ ዳሪን ዲዛ ዎሳ ኬላይሳ። ሂና ሄ ዎሳ ኬላያ ጳውሎስ ኮይሮ ኣወርፓን ኤሲዳ ዎሳ ኬላዮ፤ ፒሊጲሲዮስ ካታማን ዲዛ ኣሳፔ ዳሪዛ ባጋይ ኦሮሜ ቢታፌ ዪዳ ኣሳ፤ ሄሳፌ ዴንዲዳይሳን ዳሮቲ ኦቶሬቴቲስ። (ሃዋ 16:21) ኢስታፌ ባጋይቲ ኪርሰቶሳን ኣማኒዛይታ፤ ሄሳ ጊሻሰ ባ ኣሳታን ኢጾቲዳይታኔ ጎዴቲዛይታ ጊዲዳ፤ ሄሲካ ኢስቲ ሃ ኣላሜ ዲሳን ማንቆ ጊዳና ማላ ኦሊዴስ። (2ቆሮ 8:2) ጊዲኮካ ኢስቲ ኣማኖን ሚኒ ኤቂዲ ሃንኮ ኣማኒሼ ዋዩቲዛይታ ማዲዛይታ ጊዲዳ፤ ሄሳ ጋሶን ጳውሎስ ኢስታ ኣዳፌ ሲቄስ።

ሃ ኪታይ ጳፊቲዳይ ጳውሎስ ቃሾሶን ዲሺን ሃንኮ ኣማኒዛ ኦሳንቻታፔ ኤቄቴሉ ኢዛ ጋኪን ፒሊጲሲዮስን ዲዛ ዎሳ ኬላይ ጋርሳን ዴንዲዳ ዎርዶ ቲሚርቲ ጋሶን ኢዛ ዎዚናይ ሜቂ ዲሺና። ጊዶ ኣቲን ሃ ኪታዛን ቆንጨ ቤቲዛይ ኡፋይሲኔ ኩሚሳ ኣማኔቴሉ። ጳውሎስ ሄሳ ሄ ኪታዛ ጳፊዳ ጋሶይካ ኢዚ ሜቶቲ ዲሺን ፒሊጲሲኔ ኣማኒዛ ኣሳይ ኢዛሰ ማዶ ዬዲዳ ጊሻሰ ኢስታ ጋላታናስኮ! ኢዛ ቦላ ጊዲን ዎይኮ ኢስታ ቦላ ዲማ ዲማ ሜቶቲ ጋኪኮካ ኢስታሰ ዳሮ ጸላቴሉኔ ኩሚሳ ሚኖ ኣማኖይ ኢስታሰ ዳና ማላ ኢዚ ኢስታ ሚንፊሉ። ኦቶሬቴሉኔ ጨቄቴሉ ኣጊዲ ዬሱስ ኪርሰቶሳ ኣሽኬቴላን ኩማና ማላ ኢዚ ኢስታ ሚንፊ ቆፍሴስ። ኢስቲ ዬሱስ ኪርሰቶሳራ ኣያናን ኢሲኖ ጊዲዲ ዴሚዳ ዴኦዚ ጸሳ ኪያቴላፌ ቤቲዳይሳኔ ኢስቲ ኣማኖን ኤኪዳይሳፌ ኣቲን ዎጋ ናጎን ቤቲዳይሳ ጊዴና ጊዲ ኢዚ ኢስታ ቆፍሴስ። ዬሱስ ኪርሰቶሳራ ኢሲፊቴላን ዲዛ ኡባታሰ ጸሲ ኢስታሰ ኣሚዛ ሳርቲላ ጊሻሲኔ ኡፋይሳ ጊሻሲካ ጳፊዴስ።

ሃይሲ ሃ ኪታዚ ኤሬቲዛይ ኡፋይሰ፤ ኣማኔቴሉ፤ ኢሲፊቴሉኔ ኣማኖን ዴኦን ሚኒ ኤቃና ማላ ቆንጨሲ ቤሲዛይሳና፤ ቃሴካ ሃዋሬ ጳውሎስ ፒሊጲሲዮስ ዎሳ ኬላዮ ዳሮ ሲቂዛይሳ ቆንጨሴስ።

ሃ ማጻፋይ ኦይኪዳ ኩሜላ ቆፋ

ጌሎሶ 1:1-11

ጳውሎስ ዲሳ ጊሻስ 1:12-26

ኣማኖን ዲሳስ ለሚሶ 1:27—2:18

ጸምቶሳን ኣፍሮዲጾ ቆፋ 2:19-30

ኣማኖ ኢጲዛይታፔ ናጌታና ማላ ዮቶ 3:1—4:9

ጳውሎስ ፕሊጲስቶስን ኣማኒዛይታስ ሺሺዳ ጋላታኔ ዞሬ
4:10-20

ኩሻ ቆፋ 4:21-23

1 ዩሱስ ኪርስቶስ ኦሳንቻ ጊዲዳ ጳውሎስፔፔ ጸምቶሳፔ ዋሳ ኬላ ጨማታራኔ ዳቆኔታራ ኢሲፌ ፕሊጲስቶስ ዳሬን ዲዛ ኣማኒዛይታስ ዩሱስ ኪርስቶስ ዲማቲዳይታስ ኡባስ፡

2 ኑ ኣዋ ጸሳፌ፡ ጎዳ ዩሱስ ኪርስቶስፔ ኪያቴሊኔ ሳሮቴሊ ኢንቴስ ጊዶ፡፡

ጋላታ ዋሳ

3 ኢንቴና ቆፒዛ ኡባ ጋላስ ታኒ ታ ጸሳ ጋላታይስ፡፡

4 ኡባ ጋላስ ኢንቴ ጊሻስ ታ ዋሲዛ ዋዴ ኡፋይሳን ዋሳይስ፡፡

5 ኮይሮ ጋላሳፌ ሃ ሲሚን ሃኖ ጋካናስ ሚሺራቾ ቃላ ኦሶን ኢንቴ ታናራ ዴታ፡፡

6 ኢንቴናን ሎኦ ኦሶ ዶሚዳይሲ ኢዚ ዩሱስ ኪርስቶስ ወርሴላ ፒርዳስ ያና ጋካናስ ኢንቴና ዳንዳይሳናይሳ ታ ኣማናይስ፡፡

7 ታ ሃኢ ቃሾ ኬላን ዲሺኒኔ ታ ቃሺታናፔካ ካሴ ሚሺራቾ ቃላ ቱማ ናጋናሲኔ ሚንፎላናስ ጸሲ ታስ ባ ኪያቴላን ኣሚዳ ማዶን ኢንቴ ወሪካ ታናራ ኢሲፌ ኦሊዳይታ ጊዲዳ ጊሻስ ኢንቴ ኡባ ጋላስ ታ ዋዚናፔ ጳዬኬታ፤ ሄሳ ጊሻስ ታኒ ኢንቴ ጊሻስ ቆፓናስ ቤሴስ፡፡

8 ታ ኢንቴና ዩሱስ ኪርስቶስ ሲቆን ዋስታ ላሞቲዛኮ ጸሲ ታስ ማርካ፡፡

9 ኢንቴ ሲቆይ ኤራቴላኒኔ ኣኬካን ኬሂ ዳራና ማላ ታ ዋሳይስ፡፡

10 ሄሲካ ኢንቴ ኡባፌ ኣጲዛይሳ ሻኪ ኤራና ማላኔ ዩሱስ ኪርስቶስ ዩሳ ጋላስ ጋካናስ ኢንቴ ጌሻታኔ ዋሶይ ባይንዳይታ ጊዳና ማላ ኮያይስ፡፡

11 ጸሳ ቦንቺሲዛይሳኔ ጋላቲሲዛይሳ ኢንቴ ኦላና ማላ ዩሱስ ኪርስቶስን ቤቲዛ ጌሻቴላ ኣይፌን ኢንቴ ዋዚናይ ኩሞ፡፡

ጳውሎስ ቃሼቴላን ሚሺራቾ ቃላ ዲቕ

12 ሃኢካ ታ ኢሻቶ! ታ ቦላ ጋኪዳ ሜቶይ ሚሺራቾ ቃላይ ካሴፔ ኬሂ ኣካናስ ጊዲዳይሳ ኢንቴ ኤራና ማላ ታ ኮያይሰ።

13 ሄሳ ጊሻስ ታ ቃሼቴላይ ኪርሰቶሳ ጊሻስ ጊዲዳይሲ ካዎ ኬላ ዛቤታሲኔ ሃራታሰካ ኤሬቴዴሰ።

14 ታ ቃሼቴዳይሳ ጋሶን ኣማኒዛይቲ ጸሓ ቃላ ባቦንታ ጸላቴላን ኣሳስ ማርካታናስ ሚኖቴሐ ዴሚዳ።

15 ኢሲ ኢሲ ኣሳቲ ጮ ኑ ኢዛፔ ዋኒዶን ጌላኒኔ ሆሎቴላን ሳባኬቴስ፤ ባጋይቲ ቃሴ ሎኦ ቆፋራ ኪርሰቶሳ ጊሻስ ሳባኬቴስ።

16 ባጋይቲ ታኒ ሚሺራቾ ቃላ ጊሻስ ሞቴታና ሃን ዲዛይሳ ኤሪዛ ጊሻስ ሲቆን ሳባኬቴስ።

17 ሃንኮይቲ ቃሴ ሎኦ ቆፋን ጊዶንታ ታና ጋኪዳ ቃሾዛ ቦላ ሃራ ዋዬ ጋላናሲኔ ባ ኢታ ቆፋ ፖላናስ ኪርሰቶሳ ሳባኬቴስ።

18 ሄሳ ጊዲኮ ኣይ ሜቶ ዲዛይ! ዋና ኣይፌ ዮኦይ ሱሬቴላን ጊዲን ወይኮ ሚሳቲሶን ጊዲንካ ኣዋራካ ኪርሰቶሳ ሳባኪዛ ጊሻስ ታ ኡፋዬታይሰ።

19 ታ ቦላ ጋኪዳ ሜቶፔ ታ ኣፋናይ ኢንቴ ዋሳኒኔ ዬሱስ ኪርሰቶሳ ኣያና ማዶን ጊዲዳይሳ ታ ኤራይስ።

20 ታ ኣይ ኦጌራካ ዬላቶንታ ማላ ሚኖ ኡፋይሲኔ ላዋታይ ታስ ዴሰ፤ ጊዶ ኣቲን ካሴካ ሃቺካ፥ ታ ሃይቂንካ ፓጻ ዲንካ ኪርሰቶሲ ታ ኣሾን ቦንቺታናይሳ ታኒ ጸላቴላን ሃሳያይሰ።

21 ታስ ዱስ ጉሲ ኪርሰቶሳ፤ ሃይቆይካ ታስ ጎኣ።

22 ጊዶ ኣቲን ታኒ ሃይሳ ኣሾ ዱሳን ጉጃ ዲዛኮ ኣይፌ ኢሚዛ ኦሶ ኦላይስ ጉሳ፤ ታ ኣዋይሳ ዶራናኮ ታስ ኤሬቴና።

23 ሃ ናምኡ ሃኖታን ሜቶቴታዲሰ፤ ታ ባዳ ኪርሰቶሳራ ዳናስ ላዋታይሰ፤ ሄሲ ሃራ ኡባፌ ኬሂ ሎኦ።

24 ጊዶ ኣቲን ታስ ኣሾን ዱሲ ኢንቴስ ኬሂ ኮሼስ።

25 ሄሳ ኣኬካዳ ኢንቴ ኣማኖን ዲጫና ማላኔ ኡፋዬታና ማላ ኢንቴ ኡባታ ማታን ጋምኣናይሳኔ ዳናይሳ ታ ኤራይሰ።

26 ታ ሄ ባዳ ኢንቴ ኣቻን ዴኢኮ ታ ጋሶን ኢንቴስ ኪርሰቶሳን ዲዛ ጨፍቴሉ ዲራና።

27 ኪርሰቶሳ ሚሺራቾ ቃላስ ቤሲዛ ማላ ዲቴ፤ ሄሳሎ ሃንካ ታ ኢንቴና ባዳ ቤኢዳኮ ወይኮ ሃሆን ዳዳ ኢንቴ ጊሻስ ታ ሲዬዛኮ ኢንቴ ሚሺራቾ ቃላ ኣማኖስ ኢሲፌ ኦሌቴሼ ኢሲ ኣያናን ኢንቴ ሚኒ ኤቃናይሳ ታ ኤራይሰ።

28 ኣይ ኦጌራካ ኢንቴናራ ኤቁቴዛይታስ ሂርጎፍቴ፤ ሄሲ ኢስቲ ጳያናይሳሲኔ ኢንቴ ኣታናይሳስ ጸሳፌ ኢሜቲዳ ማላታ።

29 ኢንቴ ኪርሰቶሳ ኣማኒዛይታ ጸላ ጊዶንታ ኢዛ ጊሻስ ዋዬ ኤኪዛይታ ጊዳና ማላ ሃይሲ ጸሳ ኪያቴሉ ኢንቴስ ኢሜቲዳስ።

30 ኢንቴ ካሴ ቤኢዳ ማላ ሃኢካ ታ ቦላ ዲዛይሳ ኢንቴ ሲዩዛይሳ ማላ ሄሳሉ ኢንቴናካ ዋዩሶን ዳስ።

2

ኣሽኬቴሉ ኪርሰቶሳፕ ታማር

1-2 ኢንቴስ ኪርሰቶሳ ባጋራ ቤቲዳ ኢሲፊቴላ ጋሶን ኢሶይ ኢሳ ሚንፌሉዛዝ ሲቆ ጊዲንካ ዋይኮ ኣያና ኢሲፊቴሉ ዋይኮ ማርይኔ ኣሳስ ሚሹቴሉ ኢንቴ ጋርሳን ዲኮ ኢንቴ ኣስ ሲቆን ኢሲ ኣያናኒኔ ኢሲ ቆፋን ጊዲዲ ታ ኡፋይስ ፖሊቴ።

3 ኣስ ኡባ ኢንቴፌ ቦላራ ጸሊቴ ኣቲን ኢንቴርካ ኢንቴና ዶሶን ዋይኮ ጎኣይ ባይንዳ ጋላታ ኤካናስ ኢሲ ሚሹካ ኦሶፍቴ።

4 ኢንቴፌ ኢሲ ኢሲ ኣሲ ሃራ ኣስ ጎኢዛይሳ ጸሊቴ ኣቲን ኢንቴ ጎኣ ጸላ ጸሎፍቴ።

5 ዬሱስ ኪርሰቶሳስ ዲዛ ኣሽኬቴሉ ኢንቴ ኣቻንካ ዶ።

6 ኢዚ ጸሳኮሺን ባና ጸሳራ ጊኒሳናስ ኮዩቤና።

7 ጊዶ ኣቲን ኣይሌ ሜፉ ኤኪዲ ኣስ ሚሳቲዲ ባርካ ባና ኤያ ኣስ ኬሲዳስ።

8 ኣስ ጊዲ ቆንጨዲካ ባና ኣሳፔ ዚቂሲዳስ፤ ሃይቃና ጋካናስ ሄሲካ ማሰቃሌ ቦላ ካቂቲ ሃይቃና ጋካናስ ኣዛዜቲዳስ።

9 ሄሳ ጊሻስ ጸሲ ኢዛ ዳር ጶቁ ሂስቲዳስ፤ ሱንሉ ኡባፌ ጶቁ ጊዳ ሱንሉ ኢዛስ ኢሚዳስ።

10 ሄሲካ ሳሎኒኔ ሳኣን፤ ሳኣፔ ጋርሳንካ ዲዛ ሜጴቴሉኔ ጉልባቴይ ዉሪ ዬሱሳ ሱንላስ ጉልባታና ማላሳ።

11 ኣሳ ኢንጻርሲ ዉሪካ ጸሳ ኣዋ ቦንቸስ ዬሱስ ኪርሰቶሲ ጎዳ ጊዲዳይሳ ማርካታናሳ።

ዴሪ ፖኦ

12 ሄሳ ጊሻስ ታ ኢሻቶ! ኢንቴ ካሴ ኡባ ዋዴ ኣዛዜቲዛይታ ጊዲዳ ማላ ሃኢካ ታኒ ማታን ዶንታ ኢንቴፌ ሃሆን ዲኮካ ኢንቴ ኣቶቴላይ ኩሚሉ ጊዳና ማላ ያሻቴላኒኔ ቦንቸን ፖሊቴ።

13 ጸሲ ኢንቴስ ኣዛዜቴሉ ኢሚሹ ባ ቆፋ ዉርሴሉ ጋካናስ ኢንቴ ጊዶን ኦፊስ።

14 ኣይ ሚሺካ ዙዙንሒኔ ፓላማይ ባይንዳ ኦሊቴ።

15 ሄሲካ ኢንቴ ኢታኔ ጌላ ኣሳ ጊዶን ጌሻታኔ ዋሶይ ባይንዳ ጸሳ ናይታ ጊዲዲ ኣላማ ቦላ ኣርሼ ማላ ዴሬ ኡባስ ፖኣናሳ።

16 ኢንቴ ኤኪዳ ዴኦ ቃላ ሎኤሊ ኦይኪኮ ኪርሰቶሲ ሃ ሲሚ ዪዛ ዋዴ ታ ሜላ ዳቡርንታይሳ ጊሻስ ታ ጨቄታናዚ ታስ ዴስ።

17 ቃሴካ ኢንቴስ ጎዳን ዲዛ ኣማኖይ ኢንቴ ጸሳስ ሺሺዳ ዲማ ያርሾ ማላ ታ ሽምፖይ ኢንቴ ያርሾራ ኢሲፌ ያርሾ ማላ ጉኪዛኮ ኢንቴናራ ታኒካ ኡፋዬታና።

18 ሄሳፆካ ኢንቴ ኢንቴስ ኡፋዬቲዲ ታናካ ኡፋይሳናስ ቤሴስ።

ጲምቶሳ ዋሳኔ ኣፍርዲጾ ዋሳ

19 ጎዳይ ማዲኮ ጲምቶሳ ኢንቴኮ ዬዳዳ ኢንቴ ሎኤቴላ ጊሻስ ሎኦ ዋሬታ ሲያናስ ኮያይስ።

20 ኢንቴ ሎኤቴላ ጊሻስ ቆፒዛ ኣሲ ሃራ ኢዛ ማላይ ኦኒካ ባ።

21 ሃራይ ዉሪካ ዬሱስ ኪርሰቶሳይሳ ጊዶንታ ባ ጎኣስ ዋጺዛዴ ጸላላ።

22 ጊዶ ኣቲን ኢንቴ ኤሪዛይሳ ማላ ጲምቶሲ ኢዚ ኣይ ማላ ኣሳኮ ባ ጊሻስ ማርካሲዴስ። ናይ ባ ኣዋራ ኦሊዛ ማላ ታናራ ሚሺራቾ ቃላ ዮቲዴስ።

23 ሄሳ ጊሻስ ሃይሳፌ ሲንፋን ታ ዋናናኮ ሻካ ኤሪዳፔ ጉዬ ኢዛ ታ ኢንቴኮ ኪታና ቆፓይስ።

24 ታኒካ ኢንቴኮ ማታ ዋዴ ባናይሳ ጎዳን ኣማኔታይስ።

25 ሄሳፆካ ኢንቴ ታና ኮሺዛ ሚሻን ኡባን ማዳና ማላኔ ሎኤሊ ኦይካና ማላ ዬዲዳ ኣፍርዲጾ ታ ኢንቴኮ ዛራ ዬዳና ማላ ኮሺዛይሲ ታስ ኤሬቲዴስ።

26 ጋሶይካ ኢዚ ኢንቴና ኩሜላታ ቤያናስ ላሞቲዳ ጊሻሲኔ ቃሴካ ኢንቴ ኢዛ ሳኮዛ ሲዬዳይሳስ ቆፒዳ ጊሻሳ።

27 ቱማፔካ ኢዚ ሃርጊዲ ሃይቂሼ ኣቲዴስ፤ ጊዶ ኣቲን ጸሲ ኢዛ ማሪዴስ፤ ታ ካሴ ሙዙቲዛይሳ ቦላ ሃራ ሙዙይ ጉጁቶንታ ማላ ታናካ ማዲዴስ።

28 ሄሳ ጊሻስ ኢንቴ ኢዛ ቤኢዲ ኡፋዬታና ማላኔ ታኒካ ሂርጋፌ ሽምፓና ማላ ኣሞታይስ።

29 ኢንቴ ኢዛ ኬሂ ኡፋይሳን ሞኪ ኤኪቴ፤ ኢዛ ማላ ኣሳታካ ቦንቺቴ።

30 እንቲ ታና ማታን ዲዲ ኦሊ ማዳናስ ዳንዳዮንታ ጊሻስ ኢዚ ባ ሽምፖስ ሚሼቶንታ ታና ኦሊ ማዲዲ ኪርስቶሳ ኦሶ ጋሶን ሃይቂሼ ኣቲዴስ።

3

ኣሾን ጨቂታናስ ቤሴና

1 ታ ኢሻቶ! ሃይሳፌ ሃራ ታ ኢንቲና ገዛይ ጎዳን ኡፋዬቲቲ፤ ሃኢካ ዛሬዳ ኢዛ ታ ኢንቲስ ጸፊኮ ታና ሳሌፊና፤ ኢንቲናካ ጎኣና።

2 ሄይታ ካና ማላ ሁስካቲዛይታ፤ ኢታ ኦሊዛይታ፤ ኣሳስ ሜቄላ ሜንሊዛ ኣሳታ፤ ናጌቲቲ።

3 ቱሙ ቃጸሬቲዳይቲ፤ ጸስ ዋሲዛይቲ፤ ዬሱስ ኪርስቶሳን ጨቂዛይቲ፤ ኣሾን ጨቂቶንታይቲ፤ ኣሾንካ ኣማኔቶንታይቲ ኦና።

4 ታኒ ጨቃና ኮይኮ ኣሾ ባጋራ ጨቃና ሚሺ ታስካ ዴስ፤ ኦናስካ ኣሾን ጨቂዛ ሚሺ ዲዛ ሚሳቲኮ ታ ኢዛ፤ ኣቋይስ።

5 ታኒ ዬሌቲዳ ኦስፑንፋ ጋላስ ቃጸሬታዲስ፤ ታ ኢስራኤሌ ዘሬሊኔ ቢኒያሜ ኮቻፌ ዬሌታዲስ፤ ኢብራዊታ ጊደን ታኒካ ኣዳ ኢብራዊ፤ ዋጋ ባጋራ ኦይቺዛዴይ ዲኮ ታ ካሴ ፋርሳዊ።

6 ሙሴ ዋጋስ ዚልኤቲዛይሳ ጊዲኮ ታኒ ካሴ ዋሳ ኬፋ ጎዲዛዴ። ዋጋ ናጎን ቤቲዛ ጸሎቴላ ጊዲኮ ካሴ ታ ቦላ ኢሲ ዋሶይካ ዴና።

7 ጊደ ኣቲን ታስ ጎኣ ጊዲዳይሳ ኡባ ኪርስቶሳ ጊሻስ ጋዳ ጎኣይ ባይንዳ ሚሻ ማላ ቆዳዲስ።

8 ሄሳፌካ ታ ጎዳ ዬሱስ ኪርስቶሳ ኤሮፔ ኣቋዛይ ሃራይ ኣይኮይካ ባይንዳይሳ ታ ኣማኒዛ ጊሻስ ኡባካ ጎኣይ ባይንዳ ሚሻ ማላ ቆዳዲስ፤ ታኒ ኢዛ ጊሻስ ጋዳ ኡባካ ኣጋዲስ፤ ታ ኪርስቶሳ ዴማና ጋዳ ኡባ ሚሻካ ዋራ ዋቋዳ ኢታ ሚሻ ማላ ቆዳዲስ።

9 ታኒ ሄሳፋ ኦሊዛ ጋሶይካ ካሴ ሙሴ ዋጋን ታስ ዲዛ ጸሎቴላ ኣጋዳ ኣማናን ቤቲዛ ጸሳ ጸሎቴላ ኪርስቶሳን ኣማናዳ ዴማናሲኔ ታ ኢዛራ ኢሲፌ ዴኣናሳ።

10 ኪርስቶሳኔ ኢዚ ሃይቂ ዴንዲዳ ዴንፋ ዋልቃ ታ ኤራና ማላ ኢዛ ዋዬካ ታ ኢዛራ ጊሼታና ማላኔ ሃይቆንካ ታ ኢዛ ሚሳታና ማላ ኣሞታይስ።

11 ሄሳፋካ ታ ሃይቃ ዴንዲዳ፤ ጉዬ ሜርናስ ዳናስ ኮያይስ።

ወርሴል ጋካናስ ዋሕ

12 ታ ሃይሳ ወርሳ ዳማዲስ ዋይኮ ሃይሳሶ ሃናዲስ ጉስ ጊዳና፤ ጊዳ ኣቲን ዬሱስ ኪርስቶስ ታና ባስ ሂስቲዲ ታስ ገግሲዳ ዋይቶ ኤካናስ ሚና ዋላ ቦላ ዳይስ።

13 ታ ኢሻቶ! ታ ሃኢ ታ ኮይዛይሳካ ኦይኪዳ ማላ ቆዲኬ፤ ጊዳ ኣቲን ታ ኢሲ ሚሽ ኦላና፤ ታፔ ጉዬራ ዲዛይሳ ኣጋ ኣጋዳ ታፔ ሲንላን ዲዛይሳ ኦይካናስ ዛራዳይስ።

14 ጸሲ ታና ዬሱስ ኪርስቶስ ባጋራ ፑዴ ጸይጊዳ ጊሻስ ዋይቶ ጋካ ኤካናስ ኤሌላይስ።

15 ሂሳ ጊሻስ ኮኒ ኣማኖን ሚኒዲይቲ ወሪካ ሃኒዛ ዮኦ ኡባ ሄሳሶ ጸላናስ ቤሴስ፤ ኢሲ ኢሲ ዱማ ቆፋይ ኢንቴስ ዲኮ ሄሳካ ጸሲ ኢንቴስ ቆንጨሳና።

16 ጊዲኮካ ኦ ሃኢ ጋኪ ኤሪዳዛን ኣኔ ሲሜሬቶስ።

17 ታ ኢሻቶ! ኣኔ ኢንቴ ታ ሃኒዛ ማላ ታና ካሊቴኔ ሃራታራካ ኢሲፌ ዳኢቴ፤ ኮኒ ኦና ኢንቴስ ለሚሶ ሂስቲ ቤሲዳ ማላ ዲዛ ኣሳታ ዋዚናን ዋሒቴ።

18 ጋሶይካ ሃይሳፌ ካሴ ታ ኢንቴስ ዛራ ዛራ ዮቲዳ ማላ ሃኢካ ዛራዳ ኣፋንላራ ኢንቴስ ዮታይስ፤ ዳርቲ ኪርስቶስ ማስቃሌስ ሞርኬ ጊዲዲ ሲሜሬቴቲስ።

19 ኢስታ ወርሴሊ ጳዮ፤ ኢስታ ኡሎይ ኢስታ ጸሳ፤ ኢስታስ ካወሻቴላይ ኢስታስ ቦንቾ፤ ኢስታ ዋዚናይ ሼምፒዳይ ሃ ቢታ ዱሳና።

20 ኦ ዳሬይ ጊዲኮ ሳሎና፤ ሄፔ ቡሮ ያናይሳ ኦና ኣሺዳ ጎዳ ዬሱስ ኪርስቶስ ዩሳ ላሞቴላን ናጎን ዶስ።

21 ኢዚካ ኡባ ባፔ ጋርሳን ሃሪሳና ዳንዳይዛ ባ ዋልቃን ዳቡራንቻ ጊዲዳ ኦ ኣሳቴል ቦንቼቲዳ ባ ኣሳቴል ሚሳቲሲዲ ላማና።

4**ወርሴላ ዞሬ**

1 ታ ኢንቴና ዶሲዛይቶ! ታ ኢንቴና ላሞቴዛይቶ! ታስ ኡፋይሲኔ ኦሶ ዛወዴ ጊዲዳ ታ ኢሻቶ! ጎዳን ሚኒ ኤቁቴ።

2 ኢንቴ ቆፋይ ጎዳን ኢሲኖ ጊዳና ማላ ኤዋዲያኔ ሲንጾኬይ ባ ጋርሳን ሲቁታና ማላ ታ ኢስታ ዋሳይስ።

3 ኤር! ኔኖ! ታናራ ኢሲፌ ኣማኔቲዳ ኦሳንቻዞ! ሚሺራቾ ቃላ ዮቶስ ታናራኔ ቃላሚንጸሳራ ቃሴካ ኢስታ ሱንላይ ዴኦ

ማጻፋን ጸፊቲዳ ሃንኮ ታናራ ኦሶ ላጌታራ ኢሲፌ ዋዬቲዳ ማጫሳታ ኔ ማዳና ማላ ታ ኔና ዋሳይሰ።

4 አይ ዋዴካ ጎዳን ኡፋዬቲቲ፤ ቃሴካ ታ ኢንቴና ኡፋዬቲቲ ጋይሰ።

5 ኢንቴ ኪያቴሊ አሰ ኡባ ኣቻን ኤሬቶ፤ ጎዳይ ያና ማቲዴሰ።

6 ሃኒዛ ዮኦን ኡባን ጋላታን፥ ዋሳኒኔ ጋናቴላን ጸሳ ሲንሐ ሽቂቲ ኣቲን አይ ሚሻንካ ሂርጎፍቴ።

7 አሳ ቆፋፔ ቦላራ ዲዛ ጸሳ ሳሮቴሊ ኢንቴ ዋዚናኔ ኢንቴ ቆፋ ወርሲ ዬሱሰ ኪርሰቶሳን ናጌሰ።

8 ወርሴላ ቦላ ታ ኢሻቶ! ቱሙ ጊዲዳ ዮኦ ኡባ፥ ቦንቾ ጊዲዳ ዮኦ ኡባ፥ አዳ ጊዲዳ ዮኦ ኡባ፥ ጌሺ ጊዲዳ ዮኦ ኡባ፥ ደሴቲዳ ሚሽ ኡባ፥ ሎኦ ጊዲዳ ዮኦ ኡባ፥ ሎኤቴሐ ጊዲንካ ጋላታካ ሃይታንታ ሚሳቲዛዝ ኡባ ቆፒቴ።

9 ኢንቴ ታፔ ታማርዳይሳ ዋይኮ ኤኪዳይሳኒ ሲዬዳይሳ ዋይኮ ቤኢዳይሳ አይ ጊዲኮካ ኡባ ኦሊቴ፤ ጎዳይ ኢንቴናራ ጊዳና።

ጳውሎሲ ማዲዳይታሰ ሺሺዳ ጋላታ

10 ዳር ዋዴፔ ጉዬ ኦራላ ቆፋራ ኢንቴ ታ ጊሻሰ ቆፎ ኦይኪዴታ፤ ሄሴካ ጎዳ ባጋራ ታና ኬሂ ኡፋይሴሰ፤ ቱሙካ ኢንቴ ታሰ ቆፎ ኣጊቤኬታሺን ኢንቴ ቆፒዳ ማላ ኦላናሰ ኢንቴሰ ሃኖ ኢጲዴሰ።

11 ታኒ ሄሳ ጊዛይ ታና ሜቲዳ ጊሻሰ ጊዴና፤ ጋሶይካ ታ አይ ሃንኮካ፥ «ዲዛይሲ ታሰ ጊዳና» ጉሰ ታማራዲሰ።

12 ፓጩካ ታ ኤራይሰ፤ ዴማዳካ ኤራይሰ፤ ጋፋዳካ፥ ካላዳካ ኤራይሰ፤ ዲንካ ቆዩንካ ኤራይሰ፤ አይ ጊዲኮካ ታሰ ዲዛይ ጊዳና ጉሳ ጹራ ታ ሎኤላ ኤራይሰ።

13 ታሰ ዋልቃ ኢሚዛ ኪርሰቶሳን ታኒ ኡባ ሚሽ ኦላናሰ ዳንዳያይሰ።

14 ጊዲኮካ ኢንቴ ታና ታ ዋዬን ማዲዳ ጊሻሰ ሎኦ ኦሊዴታ።

15 ኢንቴ ፕሊ.ጲ.ሲ.ዮሴ አሳቲ ሄሳፌ ቦላራ ኢንቴ ኤሪዛይ ኮይሮ ሚሺራቾ ቃላ ኢንቴ ኤኪዳ ዋዴ ታኒ ማቂደኒያፔ ዴንዳሺ ኢንቴፌ ኣቲን ጌዴ አሚዲካ ሃ ኤኪዲካ ማዴቲዲኔ ማዲዳ ጊዛ ዋሳ ኬሊ ታሰ ዴና።

16 ሃራይ ኣቶሺን ታ ካሴ ታሶሎንቄን ዲዛ ዋዴካ ታኒ ሜቶቲን ኢንቴ ዛሪ ዛሪ ታሰ ማዶ ዬዲዴታ።

17 ታ ሄሳ ጊዛይ ኢሚዳ ጊሻሰ ኢንቴሰ ኣንጆይ ዳራና ማላ ጋዳ ኣቲን ታ ኢንቴፌ ማዶ ኤካናሰ ኣሞታዳ ጊዳና።

¹⁸ ታስ ኮሺዛይሳኔ ታና ኮሺዛይሳፊካ ቦላራ ኤካዲስ፤ ኢንቴ ታስ ዬዲዳ ማዶ ሚሻ ኣፍሮዲጾ ኩሼፔ ኤኪን ታ ፓጩይ ኩሚዴስ፤ ሃይሲ ዳሮፔ ጾሳ ኣቻን ኤኬቲዳ ዳሮ ሎኦ ሳዊዛ ያርሾ ማላ።

¹⁹ ጾሲ ባ ዱሬቴላ ጊና ኢንቴስ ኮሺዛይሳ ጎዳ ዬሱስ ኪርሰቶሳ ባጋራ ኩንፋና።

²⁰ ኑ ኣዋሲኔ ኑ ጾሳስ ሜርናፔ ሜርናስ ቦንቾይ ጊዶ። ኣሚን።

ወርሴላ ሳሮካ

²¹ ኣማኒዛ ኣሳ ኡባ ዬሱስ ኪርሰቶሳ ሱንፋን ሳሮ ጊቴ፤ ታናራ ዲዛ ኢሻቲ ወሪካ ኢንቴና ሳሮ ጌቴስ።

²² ኣማኒዛይቲ ወሪ ሃራፔካ ቄሳሬሶ ኣሳፔ ኣማኒዛይቲ ወሪካ ኢንቴና ሳሮ ጌቴስ።

²³ ጎዳ ዬሱስ ኪርሰቶሳ ኣቶ ኪያቴሉ ኢንቴናራ ጊዶ። ኣሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b